

欽
定
全
唐
文

欽定全唐文卷四百八十三目錄

權德輿

傷馴鳥賦

洞庭春溜滿賦

行舟逗遠樹賦

齊抗平章事制

進士策問五道

貞元十三年中書試進士策問二道

貞元十九年禮部策問進士五道

貞元二十一年禮部策問五道

明經策問七道

明經策問八道

明經策問七道

元和元年吏部試上書人策問三道

宏文崇文生策問三道

道舉策問五道

欽定全唐文卷四百八十三

權德輿

德輿字載之天水畧陽人貞元時累官禮部侍郎轉戶部
元和五年拜禮部尚書同中書門下平章事罷爲本官檢
校吏部尚書留守東都封扶風郡公拜太常卿徙刑部尚
書出鎮興元卒年六十贈左僕射諡曰文

傷馴鳥賦

紛羽族之多端兮同翮飛而類殊有鸚鵡之微禽亦播質
於洪鑪因稚子之嬉遊得中園之墜雛恣飲啄以馴擾來

目前與坐隅爾乃棲以籠檻鍛其羽翼冀留軒以爲娛俾
遐翥之無力乍踉蹌而將舉顧離襪而復息雖主人之見
容終使喪天和於自得或親賓至止徽軫徐觸每聞絃而
鼓翼亦追節而翹足貌宛轉以成態聲間關而助曲乍寂
寥以閒暇若凝情以相矚理輕毳以自潔類山元之珮玉
每翔集以安卑同君子之自牧思謝尚之起舞邁風流之
逸躅苟魯昭之不君固乾侯之出辱方渡濟以申傲伊涼
德之自覆徵故老之相傳驗曩記之或存在端午之司晨
翦其舌而能言巧喉轉以達情順人心而不謾方渴日以

呈材願朱明之駿奔忽愀慘以顛頓響哀音於簾箔竟啗
啾而不去若徊翔之有託况心訝而未辨歛狺狺之攫搏
俄斃踣而不勝紛血灑以毛落彼葛盧與冶長通鳥獸之
音聲闕君子之周防無古人之至精既不能縱爾於遼廓
又不能遂爾之生成使異類之得志曾未極其飛鳴則本
夫養之之惠適足以害其生生又憶夫清江之使者東海
之波臣苟其時之不來則刳腸而涸鱗鴈鐘鼓而反悲馬
阜棧而多死雖爲遇之已甚固又天其天理嘗聞乎賢聖
之理物也智愚殊方薰蕕異藏善用無棄今互見其長各

有攸處兮兩不相傷官天地而府萬物由此道而爲常吾
旣悟斯理之不早因失之而後防收視聽以冥觀兮遂羣
性之茫茫

洞庭春溜滿賦

送陸灝
赴荊州

湖渺渺兮蕩東風以發春春溜滿兮連淨綠以無垠接遠
色於青草散晴輝於白蘋及夫反照安流煙花明麗霞生
水底鳥沒空際聽櫂謳之四起見片帆之遠逝杳空曠以
澄鮮窮千里於一睇若乃路轉涪陽波連沅湘杜蘅秀兮
蕙若芳寫雲翠兮沉夕陽月明露下靄蒼蒼結遐想於騷

人兮悄目極以心傷婉婉長離翩翩彩鷁遠泛桃花之浪
去從蓮府之辟雲兮水兮指前程於空碧

行舟逗遠樹賦

送嚴暮
赴東陽

有美一人兮桂爲楫蘭爲舟逗遠樹之晴影泛春江之碧
流乍迷雲葉稍映蘋洲凝暮色於愁睇空藹藹以悠悠的
輕舟亭亭遠質喜揚舳之漸近嗟轉岸而還失映微波
以葱蒨貯嵐翠之蒙密愴南浦之別離占橫塘之風日柳
怨別兮楓傷春望不辨兮愁殺人空江邊兮遠郊外紛離
緒兮相對顰標落照以微明暮夕煙而又晦波茫茫兮景

沉沉思結纜於清陰惜歸舟之不駐傷遠目以軫離心

齊抗平章事制

敕寅亮天工緝熙王度調陰陽以遂羣品敷教化以統百
官必得其人乃濟於理是咨茂德允式具瞻中散大夫守
太常卿上柱國賜紫金魚袋齊抗植操清貞秉心諒實精
達政理詳明典彝才器可以濟時忠正可以激俗莅事惟
肅休聲茂聞宜入贊於中樞俾發揮於景化式是百辟毗
予一人可守中書侍郎門下平章事散官勲賜如故於戲
政之得失在於弼諧爾其竭誠啟沃以廣視聽盡規獻納

以贊謀猷俾人叶中時乃之績無替朕命厥惟懋哉

進士策問五道

問六經之後百氏塞路微言大義寢以乖絕使昧者耗日
力以滅天理去夷道而趨曲學利誘於內不能自還漢廷
用經術以昇貴位傳古義以決疑獄誠爲理之本也今有
司或欲舉建中制書置五經博士條定員品列於國庠諸
生討論歲課能否然後刪非聖之書使舊章不亂則經有
師道學皆顯門以爲如何當有其說至於九流百家論著
利病有可以輔經術而施教化者皆爲別白書之

問易曰君子夕惕若厲語曰君子坦蕩蕩禮之言絅衣則曰惡其文之著也儒行則曰多文以爲富或全歸以爲孝或殺身以成仁或玉色以山立或毀方以瓦合皆若相戾未能盡通顏回三月不違仁孟軻四十不動心何者爲優柳下惠三黜而不去子文三已而無愠何者爲愈召忽死子糾管仲相小白棠君赴楚召子胥爲吳行人何者爲是析疑體要思有所聞

問周制什一是稱中正秦開阡陌以業農戰今國家參酌古道惠綏元元均節財征與之休息豐年則平糴於穀下

恒制則轉漕於關東尚虞地有遺利人有遺力生之者少
靡之者多粟帛寢輕而緡錢益重或去衣食之本以趣末
作自非翔貴之急則有甚賤之傷欲使操竒贏者無所牟
利務農桑者沛然自足以均貨力以制盈虛多才洽聞當
究其術至若管仲通幣之輕重李悝視歲之上下有可以
行於今者因亦陳之美利嘉言無辭悉數

問懲忿窒慾易象之明義使驕且吝先師之深誠至若洙
泗之門人故人漸漬於道德固已深矣而仲由慍見原壤
夷俟其爲忿與驕不亦甚與商不假蓋賜能貨殖從我之

徒而恡缺如是皆所未達試爲辨之

問育材造士爲國之本修辭待問賢者能之豈促速於儻
偶牽制於聲病之爲耶但程試司存則有拘限音韻頗叶
者或不聞於軼響珪璋特達者亦有累於微瑕欲使楚無
獻玉之泣齊無吹竽之濫取捨之際未知其方子曰盍各
言爾志趙孟亦請七子皆賦以觀鄭志又古人有述祖德
叙家風之作眾君子藏器而含章者久積善而流慶者遠
各言心術兼敘代德鄙夫虛佇以廣未聞

貞元十三年中書試進士策問二道

問先師之言辨君子小人而已勤學則舉六蔽咸事則稱九德推其性類又極於是矣孟軻之數聖者有清有和文子之言人位上五下五列夷惠於天縱頗有所疑況牛馬於最靈豈爲至當班固之古今表劉邵之人物志或品第乖迂或鈎摭纖微誠有可觀恐未盡善旣強爲已之學必有析理之精敬俟嘉言以祛未達

問乃者西裔背盟勞師備塞今戎王自斃邊遽以聞而議者或曰因其喪而弔之可以息人或曰乘其虛而伐之可以闢地或曰夷實無厭兵者危事皆所以疲中國也不若

如故是三者必有可採思以辨之

貞元十九年禮部策問進士五道

問漢廷董仲舒公孫宏對策言天人相與之際而施於教化韋元成匡衡之論以明經至宰相封侯皆本王道以及人事今雖以文以經貴祿學者而詞綺靡於景物寢失古風學因緣於記問寧窮典義說無師法經不明家有司之過敢不內訟思欲本司徒之三物崇樂正之四術不率教者屏之遠方則名義益修風俗益厚程孝秀之本業參周漢之舊章慮難改作式佇嘉話事關理本必議上聞斯乃

誠求諸生毋忽

問齊人之所以務於賦輸用給公上其大抵饋軍實奉邊備而已今北方和親亟通禮命南詔納款屢獻竒功而秦茲西戎尚有遺類猶調盛秋之戍頗動中夏之師思欲盡復河湟之地永銷烽燧之警師息左次人無外徭酌古便今當有長策乃者戎人願修前好因請其俘或曰彼實無厭絕之以固吾圉或曰姑示大信許之以靖吾人或曰歸貴種以懷其心或曰奪長技以翦其翼當蘊較然之見備陳可舉之方

問祖宗昭穆王者之盛典明祀嚴禋有國之大事頃歲奉
常上奏以獻祖之位非正太祖之尊未申而公卿諸儒雜
有其議皆以百代不遷宜居東向而獻懿二主所歸不同
或曰藏於夾室或曰寘於別廟或曰祔於德明興聖酌殷
周之制或曰遷於園寢石室採漢魏之儀而又有並居昭
穆之列竟虛其位分饗禘祫之禮互處於西眾議云云莫
有所一至今留中未下誠聖意所重難也至當無二眾君
子辨之

問人之生也稟五行之秀其化也順一氣之散而牛哀爲

獸杜宇爲鳥趙王爲蒼犬夏鯨爲黃熊傅巖之相爲星圮
橋之老爲石變化糾紛其故何也天壽貴賤賦命萬殊而
驪山之儒長平之卒歷陽之魚鼈南陽之侯王豈稟數斯
同復適然也眾君子通性命之理究古今之學幽探造化
佇所未聞

問有司之求才與多士之求進其心不相遠也諸生知之
乎計偕者幾乎五百籍奏者不逾二十蓋二十五之一也
諸生又知之乎雕龍之辨皆謂有餘靈蛇之珠無非在握
射或失鵠瑜寧揜瑕雖涇渭終分而蓬麻未直匿名飛語

金定全月二
卷五十三
一
詆訛云云誠無他腸時有讒口豈有司之道未至復諸生
之所習難化耶異時有司固諸生之所履也復何如哉非
有防川之心願聞易地之說

貞元二十一年禮部策問五道

問古之善爲政者在得人而已在求理而已周以功德詔
爵祿秦以農戰居職員漢武帝詔察茂異可以爲將相者
夫功與德非常才所及也農與戰非筮仕所宜也安危注
意之重非設科可俟也是三者同有利病幸錯綜言之又
三適之宜九品之法或計戶以貢士或限年以入官事有

可行法有可採制度當否悉期指明

問夏殷周之政忠敬文之道承弊以救始終循環而上自五帝不言三統豈備有其政或史失其傳嬴劉而下教化所尚歷代相變其事如何豈風俗漸靡不登於古復救之道之之道有所未至耶國家化光三代首冠百王固以忠厚勝茲文弊前代損益佇聞討論遠數之中所希體要也

問古者士足以理官業工足以備器用商足以通貨賄而農者居多所以務三時之功有九年之蓄用阜其業實藏於人乃者情游相因頗復去本今皇帝勵精至化在宥萬

方德音聖澤際天接地凡宏於理道者無不至也裕於濟人者無不被也而又詢吏祿公田之制稽財征權筦之宜使羣有司質政損益庶官匹士皆得上言眾君子躬先師之儒生盛聖之代佇茲嘉話當薦所聞

問昔伊尹酒保傳說胥靡竟昌殷道以阜王業春秋時觀丁父彭仲爽申都之俘也克州蓼封陳蔡楚邦賴之漢廷韓安國徒中拜二千石張釋之以貲爲郎並稱名臣焯敘前史然則俘徒作役或財用自發前代取之而得人如是魏晉已降流品漸分筮仕之初率先文學或薦賢推擇皆

秀發州閭而致理之風頗未及古豈朴散浸久或求之太精其故何也常有所惜今四門大闢百度惟貞執事者固欲上副聰明悉搜才實幸酌古道指陳所宜

問言身之文也又曰灼於中必文於外司馬相如揚雄藉甚漢廷其文盛矣或奏琴心而滌器或贊符命以投閣其於溺情敗度又奚事於文章耶至若孔融攔衡夸傲於代禍不旋踵何可勝言兩漢亦有質朴敦厚之科廉清孝順之舉皆本於行而遺其文復何如哉爲辨其說

明經策問七道

問孔聖屬詞邱明同恥裁成義類比事繫年居體元之前
已有先傳在獲麟之後尚列餘經豈脫簡之難徵復絕筆
之云誤子產遺愛也而賂伯石叔向遺直也而戮叔魚吳
季札附子臧而吳衰宋宣公舍與夷而宋亂陣為鷺鶴戰
豈捷於魚麗詛以犬雞信寧優於牛耳子所習也為子言
之

問三代之弊或朴或薄六經之失或愚或誣夫以殷周之
理道詩書之述作施於風俗豈皆有所未至耶輟祭納書
誠為追遠執戈挑荊無乃傷恩何二者之相反耶兩楹坐

奠歎有切於宗子九齡魂交數能移於與爾何二者之不
一耶山節藻稅豚肩狐裘皆大夫也又何相遠耶檀弓袒
免子游麻衰何如直諒而忠告之耶各以經對

問四營成卦三古遺文本自河圖演於羨里而西鄰禴祭
斯乃自多箕子利貞且居身後豈理有未究復古失其傳
乾之彖辭乃次六爻之末坎加習字有異八純之體无妄
則象稱物與同人則象引卦名或備四德而纔至悔亡或
無一德而自居貞吉訪於承學思以稽疑至若康成之陰
陽象數輔嗣之人事名理異同優劣亦爲明徵

問左史記言古之大訓何首載堯典而乃稱虞書當文思
之代而九官未命及納麓之時而四凶方去豈允恭克讓
待元德而盡善耶仲虺作誥伊尹作訓豈臣下忠規之稱
耶伯禽費誓穆公秦誓豈帝王軌範之書耶好風好雨旣
從於箕畢時若恆若復係於休咎何所適從耶伏生傳於
耄耄魯壁得於殘缺前代講訓孰爲名家可以詳言用窺
輿學

問二南之化六義之宗以類聲歌以觀風俗列國斯眾何
限於十四陳詩固多豈止於三百頌編魯頌奚異於商周

風有王風何殊於鄘衛頗疑倒置未達指歸至若以句命篇義例非一瓜瓞取絲絲之狀草蟲序嚶嚶之聲斯類則多不能具舉旣傳師學一爲起子企聞博依之喻當縱解頤之辨

問魯史成文以一字爲褒貶漢廷尚學有二傳之異同雖子夏授經孫卿肄業而去聖寢遠傳疑儻多閏以定時何非乎告朔雩乃閔雨奚有於去讓文有無天之說定有無王之年例或難通理亦未盡衛輒辭以尊祖於義安平許止闕於嘗藥受誣乃甚以茲凝滯皆藉發明穀梁子之言

固當有據應上公於古復是何神諸儒待問一爲覩縷

問孔門達者列在四科顏子不幸伯牛惡疾命之所賦誠不可同至若攻冉求以鳴鼓比宰我於朽木言語政事何補於斯七年可以卽戎百年可以去殺固弛張之有異曷遲速之相懸爲仁由已無信不立拜陽貨則時其亡也辭孺悲則歌使聞之聖人之心固當有爲鄙則未達子其辨歟

明經策問八道

問魯史之文先師用明於王道漢武之代左氏不列於學

官誠義例之可觀終巫艷而多失鳳凰故兆陳氏不得不
昌鸚鵡成謠季氏不得不叛既未然以前定於立教而謂
何同恥釋經豈其如是夏五之闕雖繫月而何嫌良八之
占於兼山爲何象因生因諡未詳命氏之殊德命類命請
數制名之義生既充賦無辭說經

問冠婚成人著代之義一獻之饗舅姑先降以奠酬三加
彌尊母兄皆拜而爲禮責婦順而則可於子道而謂何一
與之齊終身不改而狄儀有問服二姓之合爲重而孔門
多出妻蹈白刃或易於中庸引重鼎奚列於儒行揚裘襲

裘之制繼別繼禰之差生既講聞佇觀詳辨

問周制六官以倡九牧分事任之廣計名物之多下士吏胥類頗繁於冗食上農播殖力或屈於財征簡則易從寡能理眾疑宋母之失實豈周公之信然今欲舉司徒之三物教賓興之六藝又慮樂舞未通於韶濩徒玩于旄鄉射有味於和容務持弓矢適廢術學豈資賢能至若六變八變致神祇之格天產地產有禮樂之防忝貳春官企聞詳說

問作易者其有憂患乎又曰樂天知命故不憂鼓天下之

動者存乎辭又曰吉人之辭寡寂然不動則感而遂通見
幾而作乃不俟終日豈各有所趣幸備言其方至若巽之
於人爲廣穎白眼坎之於馬爲美脊薄蹄誠曲成以彌綸
何取象之瑣細佇聞體要然後忘言

問堯之文思也命羲和四嶽敬授人時其道巍巍矣舜之
登庸也則流放竄殛考績黜陟熙帝載而亮天工者二十
有二人其理昭昭矣至禹則別九州導九河分五服建五
長辛壬癸甲荒度土功其勤云云矣夫以陶唐虞夏皆聖
人也而勞逸斯殊豈時不得不然復道有所不及何事功

元德煩簡相去之遠耶願聞其說

問三綱之道有君臣焉有父子焉周南召南以風化于天下關雎鵲巢乃首於夫婦舉后妃曷若先天子美夫人曷若稱諸侯豈自邇而及遐將舉細而明大又太師所採孔聖所刪以時則齊襄先於衛頃以地則魏土徧於晉境未詳差次何所後先一言雖蔽於無邪六藝乃先於譎諫既歌乃必類何失之於愚理或出於鄭箋言無憚於匡說問褒貶之書宣父約於史氏清婉之傳卜商授於門人經有體元且無訓說日稱夜食頗近迂異徵禿眇之修聘聚

綦軌之方言晉大夫奚俟於偕行衛公子豈名其天疾隱
居攝以崇讓鄭討叛以滅親未曰申邪寧爲積慮鄒氏夾
氏學旣不傳尸子沈子復爲何者鄙夫未達有佇嘉言

問子曰君子無終日之間違仁又曰仁遠乎哉則子文之
忠文子之清由也之果求也之藝皆曰不知其仁豈盡非
君子耶胡爲乎登夫子之門而稱齊楚之賢大夫也其愚
如愚甯武與顏生孰愈三思三省季文與曾子孰優虞仲
隱居以放言下惠辱身以降志顏殊取捨皆曰逸賢探索
精微當有師說

金定卷之三 九四下之三
明經策問七道

問春秋者以仲尼明周公之志而修經邱明受仲尼之經而為傳元凱悅邱明之傳而為注然則夫子感獲麟之無應因絕筆以寄詞作為褒貶使有勸懼是則聖人無位者之為政也其於筆削義例豈皆用周法耶左氏有無經之傳杜氏又錯傳分經誠多艷富慮失根本既學於是頗嘗思乎

問大學有明德之道中庸有盡性之術關里宏教微言在茲聖而無位不敢作禮樂時當有開所以先氣志然則得

甫申之佐猶曰降神處定哀之時亦嘗聞政致知自當乎格物夢奠奚歎於宗子必若待文王之無憂遭虞帝之大德然後凝道孰爲致君爾其深惟以判斯惑

問潔淨精微研幾通變伏羲重其象文王演其辭設位盡通於三極修德豈惟於九卦何思何慮旣宜以同歸先甲先庚乃詳於出令儉德避難頗殊蹇蹇之風趨時貴近有異謙謙之吉窮理盡性之奧入神致用之精乾元用九之則大衍虛一之數成性有存存之道知幾窮至至之言旣所講聞試陳崖略

問洪範之美大同也曰子孫其逢吉數五福也曰考終命
皆其極致也至若允恭克讓而生丹朱方命圯族乃產神
禹何吉凶之相戾也金縢請命方秉珪以植璧元龜習吉
乃啟鑰而見書豈賦命之可移也絕地天通未詳厥理血
流漂杵何乃溢言待問而來宜陳師說

問風化天下形於詠歌辨理代之音厚人倫之道邶鄘編
小尚列於篇楚宋奧區豈無其什變風雅者起於何代動
天地者本自何詩南陔白華亡其辭而不獲谷風黃鳥同
其目而不刊舉毛鄭之異同辨齊魯之傳授牆面而立既

非其徒解頤之言斯有所望

問穀梁名經興於魯學劉向博習稱於漢朝或貶絕過深或象類無據非立異姓乃以莒滅成文同乎他人豈謂齊侯之子異端頗甚後學難從諱親諱賢當舉其例耳理目理幸數其言何詞所謂近於情何義所謂失於短凡厥師授爲予明之

問夫子以天縱之聖畏匡阮陳行合神明固久於某禱將行理道奚矢於天厭對社粟之問宰我強通嘆山梁之時仲由未達季氏旅岱冉求莫救皆見稱於達者或纒比於

金史卷之三十三
具臣嘗隸善言顧多滯義末卷載游夏之事終篇紀舜禹
之詞頗疑不倫可以敷暢

元和元年吏部試上書人策問三道

問天下理本繫於朝廷乃者夏州阻命益部干紀皇帝神
武制勝指期致誅二方晏清九有貞觀紀律載新於耳目
爵命畢集於勲賢內修八柄外宏九法教理刑政之要制
軍詰禁之宜使人皆嚮方兵不復用一其禮俗以致和平
酌於古而行於今舉其大而遺其細佇達聰聽子其昌言
問聖人虛心思天下之理至矣求天下之士勤矣搜於中

林縻以好爵者往往至焉君子澡身聚學被褐藏器方伯
上薦賁然而來與夫充賦計偕者異而論也其何以佐理
道陳嘉猷去徭戍而徼塞無虞減農征而財用不乏子所
蘊積悉期指明

問四方之人萃於選部六品以下實繁有司積資者豈盡
獲吏能考言者或見遺敏行一日之鑒固不能周四方所
稽亦慮未盡近自甸內達於海隅命官親人利病所屬欲
使舉皆稱職吏必首公則輪轅適宜鰥寡受賜企聞體要
一二言之

宏文崇文生策問三道

問儒館設科以優華緒亦明勤學然後審官諸生或以純綺之年講誦未暇在琢玉之或怠於製錦而如何儻稍舉章程以明課試因粲粲之質加孳孳之勤可以遠圖固爲盡善但因循旣久慮物議爲難盍自言之將求折衷

問左掖東朝載宏學敦貴游門子於是翔集法禁或弛藝實難徵推恩補員據闕升第或人疑張祿或詞假葛龔誠瑕不揜瑜豈仕優則學澄汰則衆心未允因仍則流弊寢深有司病諸幸喻其術

問鄉賦國庠已有定制又闢兩館以延諸生蓋砥礪貴游而進之於學也二三子江夏童年頗聞岐嶷舞雩春服皆已鮮明雖異賓興亦稱講業於經書所好何句於古哲所慕何人兼陳從政之方用辨保家之美

道舉策問五道

問莊生曰吾聞庖丁之言得養生焉蓋以其游刃無全善刀而藏之故也禦寇則曰養生如何肆之而已莊生曰嗜慾深者天機淺禦寇則以朝穆善理內而性交逸何二論背馳之甚耶夫一氣之斲聚爲物之逆旅誠不當傷性沽

名以耗純白儻昧者未通矯抗之說因遂耳目之勝甘心
寘力則如之何既學於斯佇有精辨

問駢拇之言曰有虞氏招仁義以撓天下天下莫不奔命
於仁義以易其性庸詎知不有性於仁義而不可易者耶
以伯夷死名於首陽之下庸詎知伯夷非安於死而不可
生耶徵濠上觀魚之樂則莊生非有虞與伯夷也又安知
有虞伯夷之不然耶徵鳧鶴短長之脛又安知有虞與伯
夷之性非不可斷不可續者耶雖欲齊同彼是先迕後合
惡用謬悠卓詭如是之甚耶蓬心未達幸發吾覆

問至人恬淡外其形骸使如死灰如木雞斯可矣至若蹈履水火而不焦沒雖以誠信庸至是乎斯所以有疑於呂梁丈人商邱開之說也蓋有以誠信安於死而不遷者未有以誠信蹈難而不必死者此何所謂其質言之

問安時處順泊然懸解至人之心也故曰材全而德不形又曰休影息迹與夫五漿先饋屨滿戶外者固不侔矣然則以紀渚之養雞痾僕之承蜩匠石之運斤梓慶之削鐻用志不分移於教化則萬物之相刃相靡者悠然而順闇然而和奚在於與無趾無眼之徒支離形德然後爲得耶

願聞其說

問文子元虛師其言於老氏計然富利得其術者朱公疑傳記之或差何本末之相遠人分五位智辨居忠信之前體包五藏耳目乖肺肝之主皆何故耶當有其說至於積德積怨實昧其圖上義上仁願聆其旨大辨若訥大道甚夷豈在顛之倒之使學者泥而不通也

欽定全唐文卷四百八十四目錄

權德輿 二

中書門下賀南詔異牟尋授冊禮畢表

中書門下賀雲南軍破吐蕃劍山保定城表

中書門下賀幽州盧龍軍節度使檢校尚書右僕射劉濟去四月十七日於室韋川等三處大破

奚虜六萬餘眾狀

中書門下賀汴州擒送李迺表

中書門下賀靈武大破吐蕃表

中書門下賀蔡州破賊表

中書門下賀劍南西川節度使去八月十八日於

雍州靈關路大破蕃寇拔木破城并破通鶴軍

天寶城應擒生斬級焚燒倉庫樓閣收獲牛馬

器械等狀

中書門下賀元誼李文通出洺州城表

中書門下賀德音減放夏麥并賑給表

中書門下賀聖躬減膳降雨表

中書門下賀雪表

中書門下賀雪表

中書門下賀雨表

中書門下賀雨表

中書門下賀雨表

中書門下賀元和殿甘露降表

中書門下賀許州連理棠樹表

中書門下賀恒州華州嘉禾合穗表

中書門下賀滑州黃河清表

中書門下賀醴泉獲白鹿表

中書門下賀河陽獲白兔表

中書門下賀邢州獲白雀白山鵲表

中書門下賀興慶池白鷓鴣表

中書門下賀神龍寺渠中瑞蓮表

中書門下賀八陵修復畢表

中書門下賀建康郡王雙誕皇曾孫狀

中書門下奉韋臯奏南詔奉聖樂章狀

中書門下賀降誕日麟德殿三教論議狀

賀除于頔太子賓客表

謝端午賜衣及器物等表

謝賜冬衣表

謝停賜口脂等表

謝每年賜錢三千貫文表

恩賜馬一疋并鞍轡及告身衣兩副等謝狀

欽定全唐文卷四百八十四

權德輿 二

中書門下賀南詔異牟尋授冊禮畢表

右今日中使某乙奉宣進止得劍南西川節度使某乙奏
得冊南詔副使寵頒狀云異牟尋以十月二十七日受冊
禮畢迎候祇應皆竭深誠又冊命之時天宇晴朗者伏以
聖澤所覃殊方卽敘奉使臣之禮遠稟綏懷當錫命之時
盡其誠敬變西南陰晦之候感天地休嘉之祥此皆睿渥
遐宣上元降祉永寧萬宇守在四夷臣等忝備台司不勝

大慶謹奉狀陳賀以聞

中書門下賀雲南軍破吐蕃劍山保定城表

臣某等言伏見劍南西川節度使具官某所奏兵馬使宋
晃前月十八日與雲南軍合勢攻破吐蕃劍山保定城當
日斬城使者伏以聲教所被遐邇大同蠢茲西戎尚有遺
類或犯亭鄣且稽靈誅陛下睿算無窮天威遠震以夷裔
感恩之眾佐藩隅制勝之臣取以多方累獻戎捷事皆前
定必稟聖謨斬將搴旗出於料外堅城便地盡落轂中通
荒服會朝之途絕餘孽窺覲之隙奉威懷之命以律而臧

兼夷夏之師在和而克此皆陛下神武潛運妖氛永清由是成擒自當盡敵臣等謬當樞近媿乏廟謀幸覩成功不勝大慶無任欣抃之至謹奉表陳賀以聞

中書門下賀幽州盧龍軍節度使檢校尚書右僕射劉濟去四月十七日於室韋川等三處大破

奚虜六萬餘眾狀

右今日中使某乙至奉宣恩命示臣等前件破賊露布者伏以王澤所覃裔夷率化蠢茲小醜敢負深恩時懷向背之心或作方隅之梗守臣宣力師律戒嚴隨其嘯聚必就

擒翦阨害之地分設三軍首級之數動逾萬計此皆睿謀
陰隲武旅成功臣等忝備台司累覩戎捷無任慶幸之至
謹奉狀陳賀以聞

中書門下賀汴州擒送李迺表

臣某等言中使某乙奉宣進止汴州以今月三日擒送李
迺軍州並已寧帖者伏以聖德含宏在宥天下而匪人醜
類自抵刑章李迺本以庸微謬從軍校潛懷狂戾輒擾師
徒乘其疾病坐邀職秩怙亂以逞志專戮以作威人思納
忠義不從惡俄就械繫一方晏然雖梟獍之心暫求假息

而鷹鷂之逐曾不崇朝眾情交欣以待朝旨陛下命將相之重撫綏是邦明書罪人且示輕典成命方下浚郊以清聖謨炳然若合符契足使義士勵節貪夫革心稟化畏威無有遠近臣等謬居台鉉每奉德音愧乏嘉猷以承睿畧無任懽忻慶幸之至謹奉表陳賀以聞

中書門下賀靈武大破吐蕃表

臣某等言臣等今日面奉德音靈武大破吐蕃擒生斬將者伏以睿謀武經陰隲上略兵符所授攻戰多方蠹茲犬羊尚勞燿燧羣帥稟命中權戒嚴犄角相因初設險於三

覆竒正合發俄獻功於七擒數酋渠之首級積戎械於亭
候勝氣餘勇鼓行無前即敘可期有征斯在臣等謬居樞
掖莫效涓埃每承以律之貞空荷止戈之運無任慶快踴
躍之至謹奉表申賀以聞

中書門下賀蔡州破賊表

臣某等言伏奉宣示蔡州行營招討使韓全義所奏云四
月二十七日於逆賊吳少誠界破賊驪子及馬步軍三千
餘人賊弟吳少陽棄眾奔遁者伏惟陛下神聖廣運丕冒
萬方而顛越匪彝自蹈鋒刃德音累降曉告不悛禁暴安

人酌於軍志命師授律發於宸心整旅有嚴拊循決勝據
便地以三覆分銳師而九攻材官突騎奮勵精勇敢行所
及莫敢枝梧奔北之徒自相蹈藉威謀克壯殺獲斯多更
俟便宜續圖攻取蒙輪超乘靡不賈餘長轂鉤援期於盡
殲此皆睿算前定純臣協心佇清淮瀆以慶天下臣等謬
居樞近喜倍恒情無任欣抃踴躍之至謹奉表陳賀以聞

中書門下賀劍南西川節度使去八月十八日於

雍州靈關路大破蕃寇拔木破城并破通鶴軍

天寶城應擒生斬級焚燒倉庫樓閣收獲羊馬

器械等狀

右今日中使某乙奉宣恩旨示臣等章某奏表大破吐蕃
生擒斬級者戎醜負恩乘秋竊發敢擾邊鄙自干誅夷伏
以睿畧無方守臣授律龔行決勝之策分遣賈勇之神面
縛首級風驅電掃屠堡柵而平其險阨焚倉廩而盡其糗
糧南路靈關旣無遺類西郊朔塞可以成擒神武指蹤四
方宣力竒功吉語相繼上聞耀天威而盡殪昭文德以即
敘止戈之慶計日可期臣等備位台司倍百歡賀無任慶
忭悅懌之至謹奉狀陳賀以聞

中書門下賀元誼李文通出洺州城表

臣某等言臣等今日面奉進止元誼李文通等蒙恩宥過以今月七日將領將士出洺州城者伏惟皇帝陛下聖神之化懷保元元仁洽好生感深格物誼等列於守將本以忠勞師旅之間失於慮始蒼黃之際自謂匪人士吏危疑謀猷回適陛下以震耀所及殺傷則多曲成以誘其衷持久以通其變愀然軫念不忍致誅待以初心許之遷善指期開壁率眾來朝實賴亭毒之恩再全臣子之節宥茲一眚昭示萬方睿慈所宏動植知幸臣等虛薄備位台司愧

無調鼎之能獲覩止戈之慶無任欣抃踴躍之至謹奉表
陳賀以聞

中書門下賀德音減放夏麥并賑給表

臣某等言伏奉今日制奉先等五縣夏麥除得水利外損
者并放長安等一十八縣更審巡覆聞奏即有進止仍委
有司計會賑給者伏惟陛下愛人之心與天合德憂勤亭
育務盡其宜頃者春澤愆期夏麥非稔若保赤子軫於皇
情降損寢食虔恭齋禱一時不雨已深求瘼之恩一穀未
登則下責躬之詔蠲其南畝之稅賑以太倉之儲德音霽

然動植相賀慘怛之愛纖悉無遺申戒官司宣明聖澤歡聲發於轂下嘉氣周於域中凡在生靈孰不鼓舞臣等謬居近列首奉鴻私旣乖燮理之能倍切負乘之愆無任捧戴慶抃之至謹奉表陳賀以聞

中書門下賀聖躬減膳降雨表

臣某等言臣聞王者祇若天心勤恤人隱必有交感之速以叶順成之祥頃自春及夏時雨尚少稼事所切皇情載勤分命官師虔修祠禱而又齋誠減膳感達上元以蒸人望歲之心爲陛下納隍之慮兼軫幽繫議寬狴牢意纔發

於穆清月已離於星畢霈然周洽曾不崇朝靡失長贏之期方興多稼之咏茂遂生植統和陰陽歡康之誠音浹遐邇臣等忝居近列獲奉昌時無任欣抃踴躍之至謹奉表陳賀以聞臣某等誠惶誠恐頓首頓首謹言

中書門下賀雪表

臣某等言臣聞王者布令以時應天以實惟茲瑞雪用兆豐年伏惟陛下齋誠念人振廩恤隱同雲斯兆宿麥可期以五穀播植之精驗於農志當一陽發生之候助此休徵感通不違朝野相賀臣等謬居近侍獲奉昌期無任欣抃

踴躍之至謹奉表陳賀以聞臣某等誠歡誠喜頓首頓首
謹言

中書門下賀雪表

臣某等言臣聞天道下濟聖心上感以是訢合發爲休徵
惟茲雨澤之祥必稽時令之順伏惟皇帝陛下憂勞庶政
勤憫蒸人鑒寐之間不忘於念慮賑恤之使相繼於道塗
膚寸興雲盈尺呈瑞以來澍之積潤爲嗣歲之順成如京
如坻百嘉可望旣霑旣足率土同歡臣等忝列侍臣倍百
欣賀無任慶抃踴躍之至謹奉表陳賀以聞臣某等誠歡

誠喜頓首頓首謹言

中書門下賀雨表

臣某等言臣聞王者以誠愛人以德動天則交感不遑庶
徵時序頃自春澤愆候上軫皇情協用五紀憂勤六事暨
純陽之節霄禱是修齋心勞慮恤隱宥過雲觸石而興潤
月離畢以呈祥南畝就功西成可望含舖鼓腹幼艾相歡
見聖人之化育符上帝之陰隲臣等忝列台司喜萬恒品
無任慶抃踴躍之至謹奉表陳賀以聞

中書門下賀雨表

臣某等言百穀所仰甘雨是資三務成功望歲斯切雖閏
候頗晚農耕未遲而時澤稍愆皇情所軫齋禱上應陰陽
以和遽興有渰之淒方茂如茨之稼況霖霖未已公私必
均叶聖道之休徵副元功之育物臣等職叨樞近喜萬恒
情無任欣賀踴躍之至謹奉表陳賀以聞臣某等誠惶誠
恐頓首頓首謹言

中書門下賀雨表

臣某等言臣聞聖人之德與天地合則庶徵時若生類昭
蘇伏惟陛下慈愛元元統御萬物憂在稼穡切於登成慮

甘澤之愆期憫蒸人之望歲誠之所感天且不違有滄而興觀一夕之霑洽大田相慶知百穀之阜蕃農夫克敏秀者皆實臺笠就緒倉箱可期遠邇幼艾忻歡鼓舞臣等謬當近侍喜萬恒情無任欣抃踴躍之至謹奉表陳賀以聞臣某等誠惶誠恐頓首頓首謹言

中書門下賀元和殿甘露降表

臣某等言今日中使某乙至奉宣進止示臣等元和殿甘露降於梧桐丁香樹者謹按孝經援神契曰王者德至天則甘露降孫氏瑞應圖曰王者和氣茂則降於草木伏惟

陛下聖德感通殊祥允集當長嬴之月下順人心降穆清
之中上昭天意太和陰隲靈液潛滋屑玉綴珠團枝泣葉
質同雪白味若飴甘灑珍木以相鮮激繁香而合發雖軒
邱頌瑞漢史紀年徒習前聞豈如目覩此皆協氣旁達天
休合符凡在懷生不勝大慶臣等謬居樞要倍萬歡誠無
任欣抃踴躍之至謹奉表陳賀以聞

中書門下賀許州連理棠樹表

臣某等言今日中使某乙至奉宣進止示臣等許州觀察
使上官浣所奏許州長社縣嘉禾鄉合穗村連理棠樹一

株者謹按孝經援神契曰王者德及草木則木連理伏惟
陛下聖澤元功浹洽生類故天休滋至地產交感亭育變
化發爲百祥珍木敷榮異根合幹表茲植物以瑞康時况
嘉禾名地已同唐叔之獻甘棠挺秀寧比召南之什芬芳
連理遐邇叶心叢滋慶祉昭煥圖籍臣等謬參鼎鼐喜萬
恒情無任欣抃踴躍之至謹奉表陳賀以聞

中書門下賀恒州華州嘉禾合穗表

臣某等言伏見王武俊所奏恒州鼓城縣生嘉禾一本合
穗又盧徵奏華州鄭縣太平鄉三交里獲嘉禾一穗者謹

按孫氏瑞應圖曰嘉禾者五穀之長王者德茂則生伏惟
陛下德叶元功仁育生類同穎擢秀殊祥並時昔周道旣
昌唐叔以獻表天下和平之兆爲陰陽訢合之符今五穀
登成百嘉儲祉發於厚載集是休徵況嶽鎮之方表章繼
至感通昭晰莫甚於斯臣等忝列台司喜倍恆品無任欣
抃踴躍之至謹奉表陳賀以聞臣某等誠歡誠喜頓首頓
首謹言

中書門下賀滑州黃河清表

臣某等言今日內侍朱希顏奉宣進止示臣鄭滑觀察使

姚南仲所奏今月一日至六日白馬縣界三十里黃河清者伏以道自積石出於崑崙乃建靈源之封特視上公之禮克符昌運必降殊祥伏惟陛下聖澤感通休徵疊委惟此濁質化爲清瀾國典所書是稱大瑞詩曰俟河之清人壽幾何歎其不可得而見也今則白馬之津三十里所澄澈如練淪漪成文一邦幼艾共觀嘉應萬寓經界式彰永寧昔秦號水德徒推厭勝漢紀河平苟安決溢神功幽贊獨表清時足以薦諸宗廟書之史策臣等忝登樞近獲奉休明無任欣抃踴躍之至謹奉表陳賀以聞臣某等誠歡

誠抃頓首頓首謹言

中書門下賀醴泉獲白鹿表

臣某等言今日中使某乙至奉宣進止示臣等醴泉縣鎮
過使康志寧於建陵柏城外得一白鹿者謹按孝經援神
契曰王者德至禽獸則白鹿見又孫氏瑞應圖曰王者惠
及下民則至伏惟皇帝陛下聖德廣運與天合符尊祖敬
宗愛人育物舍靈効祉叶贊休明惟此仁獸式彰孝理皎
然玉質俯近軒臺獨麇麇以不羣亦呦呦而遂性漢得之
於槐里齊獲之於敏邱呈祥瑞聖豈比今日臣等謬列台

金定全居五
卷四下二四
十一
司無補時化每承靈貺徒竭歡心無任欣抃踴躍之至伏
請宣付史館謹奉表陳賀以聞

中書門下賀河陽獲白兔表

臣某等言今日中使楊明義奉宣進止示臣河陽三城節
度使李元淳所奏今月六日於河陽縣城南社壇獲白兔
者謹按孫氏瑞應圖曰王者加恩耆老則白兔見又前史
所稱多自純孝所感伏惟皇帝陛下誠合天地孝通神明
元符嘉祉遠近相屬維此瑞獸是稱月精來應昌期皓然
雪彩當盟津之壘俯勾龍之壇邦畿士吏駭視歡賀且自

前歲已來中外所列凡在羽毛之族多呈皓潔之祥今八陵園寢修復斯畢萬國臣寮手足相慶盛儀旣展靈貺斯臻幽贊素姿若合符契臣等謬居台鼎倍萬恆情無任慶抃之至伏請宣付史館謹奉表陳賀以聞

中書門下賀邢州獲白雀白山鵲表

臣某等言今日伏奉宣示昭義軍節度使李元淳所進於邢州獲白雀白山鵲各一者謹按孫氏瑞應圖曰王者奉已儉約尊事耆老則白雀見又晉中興書曰天下安寧則見伏惟陛下純儉成化乾坤合符敬彼黃髮感茲霜毳俗

既登於壽域事多驗於祥經用應昌時固無虛月昔神雀
效祉乾鵲知來或用以紀年或聞諸往載豈比山禽叶質
靈貺特殊皎潔異姿追飛交映休嘉所集遐邇同歡臣等
忝列台司倍百忻賀無任喜慶踴躍之至謹奉表陳賀以
聞

中書門下賀興慶池白鷓鴣表

臣某等言伏承陛下以去月九日幸興慶池龍堂爲人祈
雨忽有一白鷓鴣見於池上眾鷓鴣羅列前後如引御舟
明日之夕甘雨遂降者伏惟陛下子惠元元躬勤庶政念

茲時澤虔於禱祈以陛下如傷之誠上感元貺在列祖發
祥之地下降靈禽潔白異姿翻飛成列若應天意以承宸
衷簇陰雲於一夕灑沛澤於千里捷均影響慶浹公私昔
周致白翟徒稱遐邇漢歌赤鴈亦薦郊廟豈比今日感於
至誠瑞牒所無蒸人何幸伏望宣付史冊昭示將來臣等
備位鼎司倍百歡賀無任欣慶抃躍之至謹奉表陳賀以
聞

中書門下賀神龍寺渠中瑞蓮表

臣某等言今日中使某至奉宣進止示臣等神龍寺殿前

渠中瑞蓮花圖其花一莖兩房者伏惟陛下仁聖感通宏
被生植宥萬方之暇必順天心於九重之中別開佛刹網
縕降祉菑菑敷榮瑞茲灼灼之花迴出田田之葉吉祥殿
外芳馥殊常功德池中光華交映扶疎發越並秀相鮮元
功嘉應超冠圖牒彼芝稱三秀麥有兩歧雖驗休祥豈階
妙法觀雙房之挺茂荷一雨之均霑陰隲生成發揮嚴淨
臣等忝居樞近倍萬歡心無任欣抃悅懌之至謹奉表陳
賀以聞

中書門下賀八陵修復畢表

臣某等言臣聞宗廟之享以致吉蠲山園之制以極嚴敬
國朝祀典參用漢法寢宮便殿虔奉衣冠日往月來久未
修復伏惟皇帝陛下繼明恭已大孝因心丕承祖宗對越
天地薦馨香於九廟崇經構於八陵庶工子來百堵皆作
人神協吉龜筮告猶用成奕奕之新實自蒸蒸之孝行官
盡復神御以安掌禮之官虔於受命奉陵之縣但觀成功
慮財用而靡賦於人量事期而不愆于素罔極之感交於
神明異斯闕宮徒頌諸侯之事叔孫原廟蓋匪先王之法
孝彰禮備豈比於今列聖在天萬方受祉春秋匪懈超冠

金史卷之三十一
百王臣等謬忝台司獲承詔旨無任誠賀之至

中書門下賀建康郡王雙誕皇曾孫狀

右今日伏見中使朱希顏云建康郡王雙誕皇曾孫者伏以聖慈馭物有亭育之仁故上天陰隲降蕃衍之祉協本支百世之義見曾孫雙誕之祥克禋克祀每勞於前古無災無害方盛於今日熊羆並夢棠棣連芳遠同華封之祝更鄙商瞿之歎斯實莫大之慶用表無疆之休所以永固皇家增輝磐石臣等忝居近列倍萬歡心無任抃躍之至謹奉狀陳賀以聞

中書門下奉韋臯奏南詔奉聖樂章狀

右中書門下奏中使楊明義奉宣韋臯所奏南詔奉聖樂章嘉其遠誠昨已閱試卿宜知悉者伏聞樂以導志感而成聲故有翕純皦繹之音韎任禁昧之奏以節百事以平八風伏惟陛下覆露法天和澤柔遠順氣旁達殊方洽歡願爲保障以稟聲朔納邸獻樂贊揚時休制氏新其曲度舌人協其辭禮雖渝舞可翫夷歌成章兩漢所書未若今日伏望宣付有司編諸史冊

中書門下賀降誕日麟德殿三教論議狀

右三教源流久無錯綜或使後學泥於通途陛下遂萬物之宜御六氣之辨徵緇黃之侶振元古之風精義入神微言盡性然後稽合同異討論指歸以元元之慈儉宏於在宥以釋氏之定惠納諸誠明用濟斯人共陶鴻化足以光策書於東觀資聖壽於南山臣等備位台庭仰承至論無任慶抃欣躍之至謹奉狀陳賀以聞

賀除于頔太子賓客表

臣某言伏見今月二十二日制書以于頔爲太子賓客凡在過咎得以昭洗凡在臣僚不勝慶躍臣其中謝伏惟陛下

下推誠恤隱宥罪申恩澤深雨露明並日月于頓幸備公
相又忝國姻而交私匪人行跡求進惡子兇悍虐殺無辜
降爲王傅使絕朝謁家居思過用愧其心在於聖恩已是
私宥今則以其嘗居重任特降殊私進於賓護復得通籍
載念循省洗其尤違懷生無不遂之人負罪有自新之路
舍養之澤與天同符山東諸侯未朝請者必欣戴恩仁浹
洽肌骨此誠王者感人心之深者也臣嘗備樞近每承音
旨衆情不至於睿慮已周古哲難行在聖姿則易寬明恤
隱遐邇歡心仰戴天慈沐浴休運無任抃躍喜賀之至謹

奉表陳賀以聞臣某誠歡誠賀頓首頓首謹言

謝端午賜衣及器物等表

臣某言中使陳忠玠至伏奉前月十七日手詔賜臣端午衣一副銀椀二隻銀鈔羅二百索一軸并大將衣服等慶賜遠降天顏如臨恩光綢繆器服輝麗成周士吏居守與師喜氣歡聲以感以忭臣某誠欣誠荷頓首頓首伏以斗杓建午之初日永星火之際陰陽肇接天地氣交陛下法象乾坤順行時令賀獻本臣子之志寵賚延君上之恩屏微無庸跼蹐斯甚佩長命之縷俾壽而臧捧在笥之衣旣

安且吉然後大敷渥澤盡感鴻私顧已難酬此生何幸無
任荷戴踴躍之至謹附中使陳忠玠奉表陳謝以聞臣誠
歡誠抃頓首頓首謹言

謝賜冬衣表

臣某言九月二十日中使孟國瑤至伏奉某月十七日敕
書手詔慰諭臣及將佐僧道百姓等并賜臣冬衣兩副大
將冬衣共四副者詔旨曲臨慶賜旁集凡在裨校一其懼
愉臣某誠歡誠喜頓首頓首臣自違奉闕庭保釐河洛異
戎師式遏之任非封部底貢之勤坐叨名器所謂尸素月

日云邁寒暑迭來再及授衣之辰每蒙挾纊之澤被服輕煖章施賤陋彼已不稱於臣則多雖竭捐軀之誠豈逃濡翼之刺撫躬愧畏上答何階無任慙懼感戴之至謹奉表陳謝以聞臣某誠惶誠恐頓首頓首謹言

謝停賜口脂等表

臣某言伏奉今月十七日手詔以諸道每年合送口脂及尺既非厚賜未足伸恩以方鎮勞煩道路爲敝一例停罷貴適便宜以示臣者恩自九天澤同萬宇伏讀詔旨仰荷皇明臣某中謝臣聞務其大者捨其細存其廣者遺其狹

故先師有寧儉之教禮經有必簡之文陛下誠切愛人志於求瘼口臘香澤豈均雨露之濡尺寸度數曷比乾坤之大以道途勞費傳置將迎鑒在事先慮周物表去煩就省約已使人合簡易於二儀燭休明於四裔臣謬居分正獲奉德音忝荷之誠倍萬恆品無任感戴悅懌之至謹奉表陳謝以聞臣某誠懽誠喜頓首頓首謹言

謝每年賜錢三千貫文表

臣某言伏奉今月三日敕東都留守額闕宜令度支每年支錢三千貫文充雜給用者伏以居守將士仰給有司省

嗇之中經費猶闕臣頃以地隣淮右事切隄防請益師徒
以崇威重至於資用未敢陳聞豈謂天澤旁流鴻私曲被
救乏恤隱已極大君之慈曠官費財益重微臣之責况違
離軒陛周歷炎涼無補盛時有叨重寄恩光積厚答效何
階無任感戴悚懼之至謹奉表陳謝以聞臣某誠惶誠荷
頓首頓首謹言

恩賜馬一疋并鞍轡及告身衣兩副等謝狀

右今日中使景忠信至伏奉恩旨賜臣前件馬并鞍轡告
身衣服等寵賚所及惶荷難勝臣自受命已來神爽飛越

晦明之際寢食靡遑思私特加榮錫備至命書煥輝渥澤
殊常出衣服於御府輟華駟於天廄負乘之懼不稱之災
慶錫有溢目之榮獎任有提耳之誠以臣愚陋負荷難勝
雖欲殺身豈酬鴻造無任感恩惶思荷戴之至謹奉狀陳
謝以聞謹奏